

姑山遺集卷十七

祭丁總戎文

壬申七月



大將軍丁公振寰之以秋七月庚申卽世也余友黃
君與權倉皇來言曰旻天不惠奄奪我丁公吾悄焉
若中流之失其維而車之喪厥輔也邈葭葦其有屬
於喬木之餘陰匪朝伊夕載笑載吟而今已矣逝莫
返矣余爲齋咨易咨以前曰有是哉卽公幾何齡曰
昔而進矣曰有名實乎曰公起家從戎始而南營旣

而青齊而興都而粵西所至有聲又最後南太南太
占北粵地情獯狻叛服靡常公仗劍凡五年而思
明之征草酋之戮都該之禽欽寇之殄寒旗獻馘頻
以告勲伐爍焉不已泰乎曰田而樂耶曰公之歸也
瑟瑟兀兀實窶且貧馬羸衣敝道遙角巾令子玉立
庭鮮雜寶蓋里壤不知其爲貴人矣余聞而泫然起
目有足哉微直君悲也余滋悲焉方今風南埃寇
蠱中螫鴛師數蹶事傷折切所在洵洵余意綺襦
之子年少不解兵動輒以債洵得老成長慮決策如

王剪其人者亂不足平也計公且優爲之而公功矣
余意帥快則罔成功洵得才氣無雙願一當前身歿
軍于知李廣其人者亂不足平也計公且優爲之而
公功矣余意將憚黷則士卒放塞內顧弗爲用洵得
清介廉潔固昔晤對秋毫無取如曹彬其人者亂不
足平也計公且優爲之而公功矣仰拊髀之徒切悼
將星之已傾戎統誰授杞憂空盈微直君悲也余滋
悲焉嗚呼絲乎與權之說既不能不爲其私以傷而
歸乎余之說復不能不爲天下以勸也與權乃以余

為知公也淡生芻方束明水告歆乞言為侑爰此宣
公惜也余卒與公無一日之驩而第托之斯文以寄
痛也

祭影菴鄭師文 丁酉六月

先是歲丙申六月十日建德太宰影菴鄭先
生薨於南原之里第其門人宣城沈壽民從
黃山奔哭湯喧如禮既歸以訃同邑秦華彥
湯績禹吳錢吳圳徐日康弟沈壽國諸咸北
面先生者于居于遊各為位哭越明年夏迄
林遇相率裂帛紀哀銜誠走奠而壽民稽首
焉之自

嗚呼事有不可臆測而群度者願起古人而問之瞻

木末之顛越實今日乎同罹洵文謝之耿耿乎千祀
升亮節以雙輝然使五坡嶺不獲而建陽不出吾不
知一公者果奮擲勇決一以抑尚隱忍乎黃冠之冥
寂處士之委蛇嗚呼貞臣在難喻婦則嫠或碎而迅
或完而遲要同心其苦亦異軌而偕歸莫墨胎後
人之爲我胡不取靈符服於馬首而猶聞西山之上
有伯夷薇也若魯易兮之喪嗚呼清漳飛血會稽絕
矣武文武則師聖賢之化龍變化朝崑崙而夕漲海雖
父建之而不取奈抑如秦獄東鎮總神靈而降雲雨
雖康回觸之而不能虧是蓋天護碩果以不食而世
珍高材以爲僕嗚呼歲在甲午我其徂池我侍夫子
空山片帷有偉衣冠有皓髮把琖連屬載欣載悲
語諄諄以未夜日非子之爲告而誰爲嗚呼雲影歷
歷洞木瀾瀾我侍夫子誨言孔微我皇九天臣孤
下遺奚相從其弗樂而又何屑屑乎寢范粲之轍闔
陳咸之屏嗚呼維公有心維我則知我侍夫子銜忍
生離期三歲以重謁奄再稔而莫追公驩帝旁小

如山遺集 卷一
子疇依而况說說吾儕其並登以國士者烏能不搏
肩仰慟輕千里而陳辭嗚呼公忠勳炳兩曜名德重
元龜貽嗣賢以清白擢衆正於布韋凡百有口人歌
人碑吾獨太息乎十餘年之內艱貞震厲無寧終日
不啻齒嚼木雪而手扞熊羆此則韓歐諸公未有遭
其不幸而今馳哀門下者將更痛於文昌之祭吏部
兩蘇之哭少師

先生山居猶嘗影卷後
有龍池河水潄潄不涸

祭陳秦宇文

庚戌十二月

嗚呼歲在丁丑公始我友我鈍而頌謬顧我厚徐勅
仲子來學姑阜揮毫洋洋有筆如帚而我導之行先
文後公曰宜哉爾策半守仲也克承勇志莫回維卵
迄木我庭我陔慙非秦山儼其徂徠說說朋英連屐
以來或鑄其業或聲其才公曰宜哉樂群毋猜甲申
既及孽狐駕虎西躡華陽東哮宛澣厥仲聞之齒切
心腐夫誰禍罹忍吾安處奮襟而南罔恤重罟公曰
宜哉苟免奚取我廬黃嶽左狼右麋魄礪崆峒疇則

矣茲是年癸巳熇暑鑠肌奄其仲至義勝而肥手孽
脰脯佐我炊廩公曰宜哉無遐爾師泊我烈宜仲先
他約水盡岷源陸輕劍閣萬里悠悠歲書數作豈無
他人莫懈離索戊戌迨今懷我心灼公曰宜哉敢負
時昨禮唯祀親求粟仁者塞予不造掩涕誰瀉厥仲
皇皇倒困我假古有鮑張庸遜其下比事異時已酉
垂夏公曰宜哉以助祝假繁公之宜實予之疾荏苒
三紀曷德以副庶陪皓首起愚拔陋云胡厭世旣耄
不又買者去問事七十也明明上蒼圯此巍峩欲瞻

無從命也則那一老俄逝萬泪滂沱或奔於途或號
於位或踊於家或哭於寄或廢於餐或寤於寐嗟我
人斯失此穹庇噫乎傷哉白日人催前月觴公把手
勸杯孰知永別千春弗迴陰風蕭颯誰壽夜臺爰速
吾黨來賻來享搏胸一慟髮髯響像爾仲哀述支骨
唯杖將叔將季從伯稽顙追數平生締四十年依公
之誠仰徹於天公騎歸天應亦我憐我辭告公
鑿焉嗚呼尚饗

祭湯復菴文

辛亥八月

嗚呼復菴已矣云胡不悲蓋我之獲交於君也甫十年而加七而君之遇我恨晚也義有急於平生總角之相知既招我以泉石又酬我以珠璣既洞我以胸臆又好我以文辭既矢我以膠漆之合又許我以葦蕩之依既進我諸孫而使備灑掃之役又翩然駕過我而相與徜徉乎修竹之下清溪之澗忽春秋其再易了不接夫崇詩真芳儀副勿藥乎有喜枵一旦乘翳駕螭而去之嗚呼復菴已矣云胡不悲方司成先

生雲蒸霞變震燦海內而君泊乎若神虬之蟠於重
泥方賢孝廉采薇啖蕨猥挂罟網而君脩乎若鴻鵠

之冥冥以飛乃是二公者一為苟之八龍位其首一

為阮之從子絕於時

山濤稱阮咸若在官
人之職必絕於時

而君之於

二公也比跡乎專與若而更奚讓為嗚呼復菴已矣

云胡不悲萬世之別一時之思無可憑而我惻將安

躡而爾追惟是清風明月想見君之遠度而抑茲雙

壁照耀如側君之音微蒼甲中無識與不識咸撫磨

而長息矧我三世葭莩之末又烏能無臨風號慟廢

寢輟食於斯嗚呼尚饗

哭許聖先文

辛亥十月

上冬癸未展墓雙羊有友馳告許子溘亡搏胸一慟
賦天茫茫天胡爲哉奪我朋李會歲不周而又許子
一旌之陽一窆之淚蕭蕭二彥事我卅年彼賢有後
此庸非賢相次無祿型先子然悲乎悲乎炎夏僕僕
手挈魚菟佐我麥粥後期唯秋一別不復漪湖澗漫
風擊濤厯我但浮舟子與追陪奄其汝哭獨往獨回
我營南山以待萎稿爾亟我事風雨遠道吾衰翁頭
爾逝曷早昨年此月有客婆東子矜我匱代觴而豐

結言重來來將焉從諸於爲義渴饑赴之我匪有德
中心慕之趨之步之掖之護之師弟道晦皦皦著之
如何一昔委而去之嗚呼傷哉何路遇之奚以憫子
子有喆弟同氣比響如篋如墳爰樹汝嗣爰妥汝
又奚憫子達人順數百年一蛻誰新誰故矧子弗
履善孔固我言雖然情實難忘昨杜今許橫涕浪
浮生幾何堪此割腸

哭家識之文

壬子十一月

壬子初節言徂旌陽哭我杜生

門人朋李也

雪虐風狂歸

尋麻水合徒而航君也聞之走書出疆覩縷疊幅要
我龍岡上云苦憶腸如涪湯一別幾歲日月本忙下
云浸衰抱疾惘惶忍今不見視息何常是時埭饑民
桑野荒廟榆鏡葛山瘳谷瘡奄弗息屬一躓而僵彼
寧而腴億庾千倉牢守弗割如丸轉蟻寧飽雀鼠不
假梓桑而君沛然大施洋洋粥之護之活不可量旄
紀雷歡官司旌揚延及郡國風移義張予時荅言君

德莫當百祥降奔何只壽康但予不歿尚來子觴回
風箭激彈指我鄉書猶在眼情實難忘曷春甫秋溘
焉以亡貧失其母善不有慶諸孤告凶驚呼但傷仰
天一慟天胡空蒼維是諸孤我宗之良為材榘楠為
器珪璋傷而登之宜廟宜堂君乎慰哉積厚發光維
是諸孤哀思徬徨有義崇館奉主以藏丐予紀石爰
題爰踰君乎慰哉晨昏汝旁議以舊築請堂祠君請予碑記君逝不
復我亦倦行削辭作奠勅兒往將金城何山鶴池何
方極目西送有隕浪浪

哭從女孫錢家婦女

壬子十二月

我徂瀨江四月維夏訪爾君舅蠹如太華誰謂華高
企斯齊之但我無畫庶其躋之爾殺既阜爾酒既旨
爾則肅拜祝予萬祉明明如昨奄不可藥別不十句
訃來驚鄂噫乎悲哉玉瘞蘭摧彼君子一逝莫回
爾父爾叔忍泪野哭不爾母告病痿牀褥君舅勞勞
推宅我招知無幾見悔予旋船予邁而西分宜溘棄
揚日方中而俄以墜彼媛之良古有敬姜口必先姑
執禮弗忘爾則是師衛涕謂我吾姑我導夙夜勿惰

克勤克恭克施克容琢詞墓石僉謀巧翁我欽其言
頷首唯唯幾年卧筆爲爾一起維爾婦德洵嫻靡忒
有如爾功亦豈易得爾培如龍門館憧憧晨餐暮盥
潔齊從容爾督爾家于桑于麻疇耕疇織各力無諱
去此湖墅言歸何許子失其依夫喪厥輔爾子堂堂
璆琳圭璋經籍是獲尚憫冥茫

祭梅朗三文 壬午

嗚呼哀哉公而止於茲也夫詠於斯哭於斯匪友伊
媾也其有知其無知也夫嗚呼哀哉余忍竟言之公
之先世德孔延善降之吉吾以下諸天公之齒未及
強仕仁者有壽吾以券諸理何位未承乎一命而算
莫躋乎中年以有數焉其然豈然嗚呼哀哉疇能出
簠六經俎籩百氏如公之澤而章乎疇能孝發幼齡
友自天愛如公之篤而良乎疇能薄身厚志懷正履
道如公之約而方乎疇能屏絕谿谷蕩豁城府如公

之和而光乎吾子猶子締有三姻同驅並策矢義則
均或披遺文於書帶天逸之室或逐玄契於梅溪石
礪之濱媿余日晏欽爾朝晨如何厭世瞬遊高旻嗚
呼哀哉世之溺矣援者無人豈其無人利欲剗之如
公矯迹木秀岳屹天又不仁奄忽奪之嗚呼哀哉

哭冷菴錢先生文

嗚呼始癸丑迄甲寅甫一年間而天奪吾友者三矣
忍言哉一爲仙源邵徵君四水徵君余同薦辟易姓
以後草衣苴屨僭追逐黃嶽間驪甚也而今已矣其
卒也以癸丑之三月一爲萊陽姜給諫卿墅給諫卿
先皇帝命謫戍宣州出國門國事變矣旣乃間關訪
余姑山下誓委骨敬亭殉明旨焉而今已矣其卒也
以癸丑之六月一爲瀨江錢冷菴先生先生砥節嚴
番時決挂冠弗還顧徐掃徑推宅招我鞅鞅於我不

卽至也今已矣其卒也以甲寅之二月夫是三君子者遭相同也義相敵也中心好我如一也生之全逢之艱奪之不一年吾誰依乎忍言哉嗚呼徵君易簣時腕搖指戰猶畫案成詩敕子見錄詒我詩成而瞑給諫臨訣詔二孤安節實節前藤杖幅巾務手致姑山毋失而冷菴先生未捐館之前四十日削札埼湖來一則曰天際真人終思匍匐一見再則曰入春裹一月糧攜一僕順風挂帆踵門畢攄心乃去乃未幾竟病病竟歿耶嗚呼忍言哉徵君厝萬山中刻日會葬往哭給諫櫬人宛哭之哀爲循遺指題厥神版屬者先生之訃朝以來余夕以赴憑棺仰慟眎天茫茫執紼罔及媿古山陽援姜舉邵冀三君子者覓侶尋歡於地下而余則踽踽隻影挽令子庚若死而哭之空有隕其如滂也嗚呼忍言哉

哀許侗伯文

嗚呼歲次辛亥余來北山翁始余顧嗜余樸頑遂相
賞音朱絃白雪明年徂遷有季推宅季也如翁篤我
肅我傾心倒肝矢無不可翁家諸父或隱櫛園昕夕
從遊日必翁賢堂堂三許好我如一慶則相驩憂則
相恤方期皓首其保歲寒如何一日均焉闔棺嗚呼
先翁而逝者爲主我之瑞伯繼翁而逝者爲事我之
天臣或相去只一歲或計日不逮乎五旬媿有身以
莫贖而翁也庶顧承好尤朱陳秦晉之締方新嗚呼

翁表心如早日煦物如陽春外朋賓客近急宗姻纔
墻東而避世旋隴上以安身路人咸爲之頌惜矧余
忝乎葦蘿松柏之依因嗚呼翁昔從哲考講道湖濱
晚敕令子祖武式循夫萬石孝謹之風邈矣乃者三
月床蓐中裙屣踰悉浣滌於一子之手斯以知賢者
有後而齊魯質行未易等倫嗚呼兩崑之麓北埭之
瀕余茲卜止有藹芳隣俄二子之無祿并奄奪乎斯
人豈不亦瞽之絕相中路誰遵山嶸嶸其空高水汨
汨其長淪雲黯黯其無色日慘慘其不親舊廬依然
酌者爲役云諸具前序者不更書

姑山遺集卷十八

宣城沈壽民耕巖著

節婦崔母焦氏墓表

戊戌七月

於戲此 明故崔公廷阜之妻節婦焦氏也表哉初
 崔公納幣於焦而病病三年矣乃婚婚無幾何死是
 時節婦年十七子宗悅三月娠耳後十三年亦竟捐
 其孤以卒於是人咸謂節婦不天天者佑窮而愍無
 告者也奪之儼者忍促之齒乎腹而襁襁而弗者忍
 不假須臾見有成立乎斯亦理之難竟測也烏乎天

既而宗悅弱冠籍諸生稱文學高等又既而文學有
子士翔士獅士翊耀振庠塾有聲又既而御史疏聞
禮官協請 天子俞奏旌闕樹楔遠吟邇歌於是人
咸謂節婦有天天者始罔窺而終如響者也困於昔
悼於今不遐其身延乃後人曷往不復曷艱不福也
烏乎無人君子曰有赫下臨無有應哉人定亦勝又
誰聽哉夫天可恃而不可恃也大倫大紀之決不可
借也而曰違數弗祥我其順天天不受順也小行小
信之也有一得也而曰心盡宜報我其俟天天亦難

俟也今觀崔管婦既聘不易志既適不息事既養不
岐向父命可弗也盟必不可寒夫迎可弗親也藥糜
不可不侍舅姑諭可謝也身必不可他辱優優殷殷
銜情抑聲耳呻目楚甘荼如飴仰不丐憐於有吳俯
不感恨於不辰生不圖歡於燕婉物不取美於名稱
志壹而效裂石斷金是以幾絕竟續有祐於宗而未
斃於聞夫乃今而後見天之玉於成也天胡易言哉
天胡易言哉士翔則曰吾大父之亡也大母哭而不
搯或怪之不知其損哀慎踊重葆遺孕也又曰大母

訓其父嚴父七歲偶廢學復楚之頸牽而擬諸井白
此奮厲力學又曰大母未卒之三年夢神持節焉召
之辭未見痘也痘矣夢如前一日類櫛長逝君子曰
節婦善存孤哉又善肅教善受命貞而仁仁而義義
而哲者也法宜得備表按節婦薛賢太平西鄉人父
董母蔣氏生嘉靖丙辰卒萬曆乙酉年三十廟祀於
萬曆丁巳建坊於崇禎甲申費日燁燁巨崔爰來自
宜豐本喬蔭別也挺然唯助於常關云胡我
好膠牢漆堅出其子弟愉愉連連或拱於庭或扶於

肩翔指謂友是賴王母爲女克女爲婦克婦愛不親
狗禍不天咎烈不輕軀末不借壽公然千鈞一髮挽
手乃繼乃緒乃假吾後厥友曰吁有硯丈夫何義匪
冠何偉匪鬚敗信改義曾不須臾大驚人國小捐人
孤狄不哀恩覆陷厥雖胡許周約退憐其豬蘇循楊
涉又勝數乎士也罔極視母媿諸翺復友告王母孔
悼艱難愴悽水履刃蹈生弗踰闕沒祭填道俎豆有
馨闕隧有造而碑無文奚以揚操友曰吁哉敢不是
効紀行琢詞風宣幽導瞻佇墟墳千祀有耀

明故孝廉同文吳公暨配張孺人合葬墓誌銘
聚族乎名城大邑之內型禮而獎義家束於尊睦而
人澤於詩書不以通閩帶閩濡跡浮澆不以軒蓋累
朝上公賢相之裔昆嶠輕其志氣此於今世未易數
也吾必以城南吳氏當之同心而恤巨難一德而樹
萃忠代覆鼎移吾庭除手足子弟之交勅罔覆與移
不始蘭而終艾不此蜀而彼魏此於今世未易數也
吾必以吳氏無忌兄弟當之生而躬行不言於海內
又安之日沒而貞概亮節胚胎後人不嶢嶢以鳴高

不察察以絕俗一旦宗祊大變陵谷大遷闔戶觸然如棟風詔此於今世未易數也吾必以無忌兄弟之先公孝廉當之嗚呼公逝十有六年予小子壽民始綴諸嗣君交末又三年遽哭其伯子巨源演也又十年余越東不及執紼會公孺人葬事又四年無忌兄弟乃手狀頓首予請將具石穿窆納銘言焉嗚呼是九里山之南麓曰陸家冲者其爲孝廉吳公之墓也哉張孺人耐而宅之峩然雙未矣而予之習其緒系友其詰胤耳其行事莫久且熟又曷敢以不文

辭按狀公諱伯敷字同文一字季布汝州知州鼇潭公諱詔相次子母麻宜人 生隆慶庚午八月七日終天啓癸亥十一月十五日年五十四公孺人副使象川公諱克家季女母王恭人 生隆慶壬申十月四日終崇禎戊辰五月二日年五十七其家也故宣城城南其窆也歲壬辰之冬仲其世及也自宋魏國正肅公迄其子丞相許國公而下凡十二傳至汝州其同產而賢而後先舉於鄉也與兄柰園先生稱兩孝廉其舉五丈夫子也曰演曰煥曰楷曰鏐曰珂皆孺人

出皆補諸生皆嗜古抗殊尙煥無忌也其出交同人也于野則梅禹金湯字江潘景升謝少連陸企生吳惟道諸公於仕則文湛持姚現聞章魯齋湯霍林沈青嶼孔玉橫解石帆吳起華諸公皆名碩皆文采聲蹟照人其亨也入庠而守蕭公漢穎令劉公澹峰奇之國士弱冠時入雍而司成劉公雲嶠奇之一夕召至前出卷激賞驚噪都下入闈而廣濟胡公仁常尤奇之拔登其門其蹇也數上春官數不第壬子之役公與其家師每先生同籍焉師每兄也又師也久蹟

翔起驟貴去公顧鬱鬱公車以老其中坦以恕也梅氏子富而坐法環賂士大夫金又嘗負公金公塞乃賂亦不責乃負所識醫盜刺給尉尉疑焉醫懼情告公公曰吾暴爾罪市名耶自承之其事勁以正也里戚梅其寶馮玄水兩開隙於里兩大紳禍扇結公昂首救力兩得解其見得必義也不以族女適蔡自殺利蔡賄遺不以從父有相豐厥家乃繼厥絕有厥家不以魯齋吏華亭徵華亭千金成約不以仁常公吏吳受吳人同室訟產及殺僕抵死者金其刻已修舊

也遼瀋陷二女子連袂竄燕邸請待公公資遣之不
來而御其往而漁之乎京口茅上舍者南雍時交也
既均訪其孤千里漬酒致奠不死而棄其生而背之
乎其偉丰儀也疎髯修二尺許飄拂若神人其雋詞
理也遺詩百餘篇別著禮記講義華嚴要解蓋公平
生動言之所積終始之所歷與夫前本支之所肇後
兆域之所藏約略具此矣而無忌兄弟則益反復備
狀也則以公夙昔多長者行孝與弟實始基之也則
以公孺人聽而婉正而惠有齊德也蓋不忍不備以

狀也初公方卯失汝州怙號毀骨立篤奉麻宜人及
兄柰園唯謹柰園課弟肅卽冠受室鮮弛假一日晚
公手野史頰批之不織芥忤宜人故議析兩孝廉居
兩孝廉踞而泣乃止居十年乃析公為擇瘠而固讓
其豐喪宜人如喪汝州焉喪兄如喪宜人焉不畢服
不與宴其卜葬汝州也形家者曰地雖良仲弗福也
公曰不伯利耳吾仲何憂公內行醇至如此孺人始
生幾不畜屹而立盆水中衆愕乃畜數歲能掌熨王
恭人腹疾滯泣不食飲年十七歸公事其姑如事母

焉罔巨細歡其心事其姒如事姑焉諸筦鑰聽命不
敢問蔡之謀賄遺於公也先婢諷孺人孺人正色起
公入而怒將叱之孺人曰拒之可矣叱也已甚公從
之公之撫族士斌者孤也孤有金主貸而資之息會
公計借北貸者死孤取償焉孺人洗橐中裝以償公
晚卧疴有年其瞿瞿糜藥晝扶宵禱亦有年汝州刻
期葬矣公病劇百舉無一集孺人焦勞部署八日而
集尊者敬之輩者睦之卑者訓之內外黨厚之凡爲
公克相復如此嗚呼士行之涼也操其文章壇社科

名閭閻之雄以震耀天下而天下亦遂同然艷之以
美而許之以聲而門以內本原密近者闕焉吾見其
流之弗永也夫門以內萬目之所不及矚鬼神於我
乎伺造孽于姓於我乎驗志者也其感人也移心術
其我應也捷影響是故君子務之于稔吳氏譜乘矣
尊官大良累葉不乏然什九以孝友著矣火蘊水積
而爛然沛然於公之一身有淑者媛黽勉佐之刑於
家佑啓於後豈偶然哉夫皐羽記哭於西臺億翁函
心於古井後世所號爲魁節絕德也文詞具在曷嘗

不低徊追歎其先人是故君子知學之有本也世亦
貴耳賤目焉耳異代之下無有進瞻無忘兄弟之餘
風者乎有萃其倫駢高競休一堂而會豈二賢之終
鮮得似而相與慕想於公之漸濡訓澤意更有深入
而旁達者又豈二賢之父之能匹美也公其不朽也
夫公孺人其不朽也夫演娶孫氏給事中濬公次子
太學生惟詔公女煥娶麻氏太僕卿鎔公孫女某公
女楷娶唐氏舉人一灝公女鏐娶徐氏尚書元太公
三子戶部郎中之慶公女又孫氏州娶王氏刑部員

外郎三元公女二女一適泉州知府貢公靖國家孫
純臣一適太學生劉公仲達子石孫男十六孫女六
演出者獻公庠生娶徐氏知州日隆公次子遠女珏
公聘章氏一女適參政梅公守峻之孫某煥出者肅
公娶麻氏諱三熹女又公娶張氏貢士厚道公孫女
哲公娶施氏庠生于衆公孫女謀公娶魏氏宣州衛
庠生諱元韜女肅公聘蔡氏布政逢時公幼子庠生
諱鳳翀女一女納貢生王君長庚子某聘楷出者允
公娶王氏諱爾衡女說公娶唐氏一灝公子諱某女

某公某公未聘女二一適參政梅公守相之孫某一
納後氏聘錢出者首公娶徐氏庠生諱日益女復公
某公未聘一女適沈鑑予壽民第四子也垌出者如
公娶唐氏庠生諱邦教女寧公娶張氏貢士諱鳳徵
女一女適蔡君鳳翀之子某曾孫七望侯宜侯獻公
出漢侯肅公出餘幼銘曰

滕國城徙再啟宇巖巖魏公纘戎祖生唯朱驩謫奚
苦死亦黨人碑厥土爰誕大相詔開府循州一逐風
雷怒帝曰汝良介汝祐祖宋迄明連冠組什人九人

孝義數中有臨江肅孔矩驅曇排聃等虫蠱千年蔽
蝕光復吐偉哉汝州繩乃武雙篤孝廉制行古孝廉
髯者鞠子五釐爾女士德爾輔厥五如虬亦如虎遭
時不然儀鴻羽吁嗟高墳過者俯爲誰者恃誰者怙

定菴梅公暨配徐孺人合葬墓誌銘

方崇禎辛巳時郡大侵蝗癘交作人枕藉死姦民嘯聚巷陌掠富人廩實爲苟活愿民踏草鋟樹不足忍喘須臾一日太守甬東錢公自斥俸錢下令所在庀釜鬻炊粥溢鄉選一人部以給吾友梅子定菴喟而起曰宛不天而以及我太守憂也罔夙夜瞿瞿罔私祿入夫非吾桑與梓也哉其委諸官弗問耶春秋宋饑而竭其粟資國人者非夫哉吾誠淪胥以瘠焉斯已矣不然烏能宴然苟而食於是趣父老還太守金

悉括橐中金浮所給金分散井里俄而盡一時頌聲
謹郡中沈子曰仁弗義弗經義弗勇弗成弗經雖惠
弗周弗成雖德弗卒卹荒經之大也畢儲而出成之
要也而梅子克舉之又克竟之不勇耶義耶不洵仁
耶夫生而有益於人者死奚忍沒其事矧吾友矧吾
友梅子世宣城人諱景堯字則之定菴其號也人稱
定菴公公廓落高志氣恥下右已者少挾策遊太學
連試有司不效輒謝去顧但僦金陵一榻歲往復爲
常諸如龍蟠之山天塹之水祖宗肇啟之城郭宮

闕與夫晉宋以來之名臺古渡芳苑舊里旣已目飽
而趾熟又如花之晨月之夕雄飲之客淫詩耽琴坐
隱之侶每懷必招招必觴觴必醉酣嬉淋漓仰面白
雲颯颯天際回眦軒駟勳狗耳而安所庸綴吾意移
吾好也者其自寄如此甲申夏退歸宛不復出時忽
忽不懌盡世所不聊於酒明年金陵不守逋帥跳奔
越所至矍弧駭馬剽殺人公廬肩孔道以居弛兵過
弗犯入山逢羣盜盜擁羣遮截與誰何尋知公斂手
請負公行沈子曰愛人者之愛於人也捷若枹鼓然

奚往而弗應已仲山善士賊還所侵苟恣散財寇不
間入茲豈一朝之故哉夫自世俗之忤忤也而惟利
之見計惜黍累寧死不假一粟捐一錢尚何有於人
之死哉天生人而百物資之錯貧與富處之富者貧
之母焉將以損餘而補不足也將以紓人嗷饑號寒
也閉耳而弗聞厚爲子孫藏而他莫之問斯其爲造
物者怒亦極矣人怨之毒之可豎毛寒心矣嗚呼愚
矣迺公沛然一施凶弭暴格卽造次足自衛若是是
故予叙往事鑿鑿蓋反復風世云公雍友內摯弟信

歿訓字諸孤俾忘爲孤居未夏楚及子弟有過溫語
令改然決不使多財損志外遇里黨有恩誦已伸物
皆約略可稱道嘗登采石超踊飛距從者吐舌相顧
公恬然又日暮飲田間歸虎掉尾路立公俾倪之徐
叱虎虎逸氣不稍奪事無鉅細可書也公生萬曆辛
丑六月四日年五十有八以卒卒之日猶力疾奠先
如禮配孺人徐氏納言公元氣女孫也生少公一歲
其卒也後公四歲年六十有一孺人修舉婦道孝事
姑姑張嫠而逮垂耄以歿也敬養與終始病至羹股

以進諸佐公行其德正教其子以學以義皆其大者
生男三女三男子儀尚實尚質咸賢有立儀質咸籍
諸生而實也退而高閔予離世獨往凡選山討壑必
隨之女長適沂州守徐公日隆孫瑋次適澄清灣張
虞璿最次適九里湯顯匡子儀娶蔡氏生鏐鐸尚實
娶濮陽氏生弘緒弘綽尚質娶劉氏生弘銓實之子
緒生驥質之子銓生驍茲以某年月日合葬公暨孺
人某山之兆時季物若干年矣若伯若仲技滄手狀
丐予銘予忍不銘銘曰

猗與梅梅伯伊始厥系遐哉夫世逃孰撫以理吾聞
宋淳熙間曰文明者實肇居乎柏枧之趾畜而不施
以貞厥軌後五葉爲卓而爲元處士義卦孔辭風披
雪擬人號稱梅易用澤流於孫子越四傳生楷楷生
繼賢賢生守仁代以襲美嗟仁公授易太中是惟弟
德遭 明奮庸蓋梅自太中首第而踵者乃振振緝
緝顯顯隆隆迄今茲以無窮仁生凝祚產博而裕凝
生初升善易是承乃娶於張比德侔偁乃育定菴燕
翼以憑吁哉定菴逝何疾泉深土厚妥此室孺人耐

之終古匹歲昨不登疇吐恤安得更起當此日

姑山遺集卷十九

宣城沈壽民耕巖著

趙孺人傳

壬午十一月姑山

孺人故瀛洲趙公諱一登之女梅公復予諱之
妻余友人枝南枝喬枝鳳枝遇之母終崇禎丁丑年
六十方是時吾鄉南東之間震震殷殷颺驟雷驚人
喘人汗駭踰道路或吁諸原或弔諸閭或哭諸位謂
里有婦者且淑而弗祿於天黔其廬赭其垣又燔其
軀灰也嗚呼其然耶其竟然耶又三年枝鳳枝遇來

如山遺集 卷十九
從余學灑涕述孺人事慟失聲又二年手狀以告偕
其兄再拜請曰嗚呼人孰無死而死有甚吾母者乎
吾曹之不速以狗也圖不朽萬一於母今辱先生矣
蓋母亡而人難吾母克婦也吾父夙夜綜家政母襄
焉澹約無所紛華先時吾王母勤治內有聲而母承
意先衆指組紉織紝及脯醢菹蒲之屬唯謹也母亡
而人難吾母克母也朝督兒下帷誦夕膏火以資禮
致儒師簪珥爲脫其有滌于遊而荒于殖誠弗暱弗
卽也母亡而人難吾母均而字也吾季父失嗣天遺

女孤母育撫女孤逾已出他視臧獲多寬假罔峻繩
也母亡而人難吾母惠而恤也吾父好行義義大小
必以力母佐之鄰人之鬻其妻也贖之妻族有棺纍
纍未瘞也代之瘞矣諸貧不能償者未嘗問也嗚呼
天也者人之所莫敢恃也然人率恃焉故伊尹曰作
善降之百祥孔子曰積善之家必有余慶言乎爲道
邇爲應捷也靡田不獲靡植不苑曷較觀吾母冥修
而隆施善耶否耶而天之報之祥耶慶耶否耶噫若
是極耶是天則時乎無知聖人之教時乎窮也初母

未卒之前數月一日忽心動作而曰難必者年乎難
竟者德乎盈吾願也千溘其予逝而予其瞑目也諷
之謀之來其鄉之窮無告者存給之及半而卒卒之
夕不戒于火憫念二小婢寢炎焰中力掖弗出反委
非命嗚呼操是心也而莫之鑒也莫之祐也高高在
上胡足問也傷哉先生忍弗言余因次其言爲之言
沈壽民曰方今江上推梅氏杞梓云行益彰學益有
聞交游益附枝之蕃厥有本哉以余觀宋伯姬保傅
不俱不下堂也火而灰禮則貞矣山陰潘妙圓之給

賊也曰焚我夫屍當從汝火而灰節則烈矣趙孺人
意不忍舍婢弗救突煙獨免天性然也火而灰仁則
至矣夫是蓋曠世三懿云或謂孺人素慈愷奉浮屠
法族長老有夢其化形大士拱受羅拜幢幡冉冉自
天來若下迎者次日而罹茲禍豈茶毗閣維之說神
焉司之而巧用之也哉抑可憫孝子之思矣夫

清所先生傳

戊戌九月

清所先生姓胡氏諱嘉亨字汝通寧之太平人也初
羅盱江出守吾寧寧士勸舞先生父童菴公往從學
而盱江顧獨器講席中爲書額揭其堂曰清白先生
因號清所云童菴公有子四其季先生先生子三季
吾友美玉瑗也美玉往言於壽民曰夫吾邑自周太
常率先鳴道忠諤震輦轂而德積沁黨里一時鉅人
響集九龍龍谿之榻軒然盱江干旄又屢望僑源至
止溱溱闐闐從者百千橫經侍几口歌手絃不可謂

會非鹿洞鷺湖戶不鄉魯也太常卽世厥猶子如仙
公再振起之其學助致知主無欲明情徹物終始孝
弟大率擴太常指而吾大人訪有獲焉乃不如仙公
遊不驩始吾大人不如仙公遊也臥疴連年忽中恫
外疾罔瘳一日聞譚道瑤潭力疾以赴罔弗瘳清風
來而煩襟開善氣栩栩移人如此哉如此哉於是乎
拾一會有約拾一會者歲會群彥於四仲拾一日也
豐餼朗規導嫩黜非周倡之胡和之於是乎節烈祠
有建節烈祠者祠竟內諸媛亭亭節烈者也垣有趾

工有需采山埏土有費周謀之胡訖之於是乎風水
解疑有說解疑者解斯人之疑誤風水者也援經据
聖呼迷起愚周持之胡決之凡吾大人之汲汲於如
仙公也蓋不啻久客得歸也蓋不啻鼓荅桴水注壑
也上揚乎聖教下軌乎民俗比而助之總以扶太常
之緒弗衰壽民拱手謹受言旣以告白水胡子胡子
曰於戲是清所先生者吾兄屬也平生諸巨細行系
矣瑗也子而疑侈夫親也槩舉綱列焉爾泉何敢復
隱復隱迺爲之陳五難迺爲之徵三應問何五難曰

人有喪其妻而不妻者乎孫孺人沒先生思蘆絮其
諸孤也矢不妻年三十餘耳終其身不復齒姬媵房
闈之事壽民曰斯子與監古之正也難哉曰人有少
而違其父嚴事其兄如父者乎靡甘弗讓靡懟弗承
剛融齟盡庭序忻忻先生殆善翁其伯氏也壽民曰
斯延平敬勝之感也難哉曰人有不位而民信不令
而衆質成者乎先生夷愉以召遜公愷以平鬪閭左
有不決官府決先生者壽民曰斯亢宗薰俗之化也
難哉曰人有愛其後之人不爲後之人陰便身圖者

乎夫膳部抗志於華陽徵君肥遯於天柱亦走炎何
徑者之所不講也先生子若孫勅往事之壽民曰斯
神與忘祿之教也難哉曰人有好行其德死而弗輟
者乎先生指困割繼勇若嗜欲病垂革猶手金錢以
待急者之控呼壽民曰斯子厚兄弟顛連之仁也難
哉問何三應曰女不痛夫而殉乎仲氏婦不贅而挺
厥貞乎季也不名高而學有成乎砥於躬型於家濡
於後謂之應非耶於戲美矣太常而下如仙公而外
鮮與媿矣於是壽民再拱手受言退而合羹玉之言

次以行

贊曰晉儒僑僑視高趾超有桀其行而口者堯真儒
恂恂浴德澡身鬼無諾責何有於人古者四民首農
終賈士也罔遇亦側其伍先生曰嗟敢恥闕堵吾斂
吾散人釜人庾大母煌煌仁施孔章日必一濟宵寧
於牀笑撫諸孫代汝橐藏先生承之滂流而光麻水
之陽天都之麓以遨以遊老我巖屋道不辭通行不
媿獨八十其齡存順沒寧有昭詒範有燁易名黔康
展惠雙之彌馨

先生訓子有家世詒範一編卒之日拾一會同人私謚曰康惠

姚太君傳

戊戌九月

姚太君者其先歙人也族冠組望一邑父尚忠置別
業於太平道秦鄉之西坦娛其風土因家焉寬衷坦
施好仁人長者相推結有女筮所宜適乃適胡是爲
太君是爲懷古先生之配是爲吾友白水泉之母白
水兄教弟期凡三人悃悃篤行沈壽民曰姚太君之
孀於胡也蓋及胡上下五世云孝而有禮敬而一義
肅而恩備德哉抑又有也不私約也不怨矣是以其
家稱之其鄉人交口誦之初太君歸先生資送腆富

先生王父錫蕃公者棟家政指繁中乏則太君適脫
珥以供卽乏卽供卽又乏又供間一兩歲寧親資送
如初又脫以供如初於是錫蕃公曰孫婦賢微賢吾
闔室窘何需先生幼失恃父君寵公繼於羅而善病
太君不姑繼也侍唯謹昕夕扶起居者十有餘年旣
舅又病病三年弗痊乃佐先生選醫慎劑惕惕左右
者又三年於是舅若姑曰婦賢微賢吾抱疴痼何措
君寵公之逝也先生苦塊癯毀又病又三年是時室
罄縣藥餌罔給太君拮据焦苦給乃已伺旦哀顛天

身請代攜持諸兒拜祈之涕泣徬徨莫能仰視於是
先生聞之而曰吾內人賢微賢吾貧吾疾且劇將何
支太君一日稱未亡人也齒逾三十耳三孤纍纍悉
詔督懷繩尺其黽勉以充讀者之脩脯宵劬晨饑恬
焉安之每茶洗鑪粒代餐而豐盂早餉塾蓋其勸諸
子學也則然已而有孫又戒諸婦勸諸孫也然至今
白水屹然鉅儒諸孫師旦師靖師亮翔騁文園譽卓
卓吾每見未嘗不縷數太君平生也曰誰賢逾吾母
吾大母者微吾母吾大母吾儕讀書策名何導嗚呼

銖絲之捐矜或見色矧其倒笥而奉諸公旬浹之勞
厭或生日矧其薦瘡而勤加毖事難責之冠帶奚有
并禕且彼縻者之於藐諸也响而翼之耳束之正課
之業嗜其鮮哉夫胡自錫蕃公而下五世矣太君仰
承頽蓄世有助焉亦既閱者五矣體常而順變貞行
而嚴訓聽婉惠愷終始無替不德秩秩備耶不施之
家家稱之傳之鄉不鄉人交口誦之耶白水曰吾母
蓋壬午七月卽世云而泉爰羈於句山踊且奔奔人
門欲絕時吾季骨柴立猶獨手襄喪事伯也喘息甚

中耳伏不能起哭不能聲傷哉且夫事親如吾伯也
亦可也揣氣而審音殫力以迎志懃懃乎靡飾弗察
靡夢弗戀焉通斯性也何間神明矣而存無及釜之
祿養沒無如綸之褒榮泉之爲母負也滋大傷哉并
志其言

沈壽民曰往予出門論交交稱有功不易哉問誰風
魁秀人嚴雅也者中心獨最僊源夫自澱江之旅魄
不還奮襤而大招招我抑吾友白水首急爾我艱我
咨剖脩佐之大之庾粟細及錙醯壽至熟也亦足媿

世之掉臂反面者矣白水早失怙怙賢母其家羹玉
早失恃恃賢父二胡學行輝輝江上雖一時蔚起乎
卒所濡染訓澤詎非素哉詎非素哉

周徵君傳

崇禎八年秋 上詔曰嗚呼百姓又安責在守今朕

稽 祖宗朝保舉成憲可遵其兩京暨在外文職諸
臣各循級舉堪任知府知州知縣者一人列蹟彙呈
議除授焉毋緩緩有罰毋濫濫有罪於是內自部尚
書外迄撫按道府咸惕慄斂衽受命益思敗官連坐
之法於異日而尤汲汲乎踰期藐制是憂進止傍徨
莫策藉手是時南京工部郎中陶公瑛奮袖起曰嗟
乎知人其難豈其難哉識闇明者不堂下推冀缺者

不中野乎吾有人而起居習之年載歷之尚何弗審
弗允訖弗有知吾昔訖太平學矣莫周生萬年也賢
吾亟以周生應明詔矣筆疏其平生卓偉十數事馳
牒移所司所司得 旨速駕焉於是人翕然稱徵君
徵君按徵君姓周氏諱萬年字世德別號寧極代以
理學倡其鄉其曾大父太常恭節公怡出侍 世廟
故與晴川榭山兩君子同忠歸謁龍谿尤與受軒宛
谿先古林三先生同學國史郡乘載紀挺然者也恭
節生子良公可貴子良生堯封公自邵堯封生徵君

徵君幼清整不群兒狎七歲能詢恭節公遺書抱以
周旋旣補諸生志益樹紹先緒闡要道敦實踐勤拳
惟謹孝事堯封公及母程孺人也力必竭竭必濟濟
必繼其卒也思必哀哀必盡喪葬準禮紫陽奉異母
母如篤其弟田廬唯所擇奚啻身如與人遊終也始
如疎也戚如慕義樂善又餒如渴如他若拾一同仁
諸會有修文峰節烈諸祠有助鄉約有飭學宮有葺
躬先之友輔之風以勸之教以束之屬屬乎徵君之
行也哉或謂徵君循默人也訥而淵言曾不口出又

如膠膠擾擾何嗟乎是烏知徵君哉不見庚午往事
乎縣胥吏弄法舞智屏大令耳目使不聰明剝割萌
黎恣填谿壑境內惴惴重足立徵君乃昌言庭斥之
如起運之虛文庫藏之中飽左右之扇結面摘發無
憚避當事爲動色忤恨聞者爲寒心豎毛弗顧也而
卒咸斂手於徵君且時至乙酉難言矣宣歙之間鼓
輦搖山谷君子恤外患小人快內逞里少年一不戒
勢且緣間殺掠階亂徵君乃陽御陰戢益申行鄉約

法闔邑以安而忘者造作飛條擠陷嚴網膏唇拭舌
競欲咀嚼不知其潛苾德也嬉怡而聽之雖撼觸無
害故夫徵君唯無言言乃碩唯無斷斷乃集剛柔翁
闡涉川才也遭時不然賈而終匱伏首譚道以老
惜哉方工部之以徵君應明詔也徵君謝弗起問何
弗起曰吾其能局促轅下耶吾其能以百里綏靖四
方耶吾其生往而死歸耶卒弗起嗚呼保舉之復予
壽民實丁焉張中丞公大蒐江南而啓事則我惶恐
牢讓弗我有聽飛檄宛部吏連趣就道顧予猶側制

科試不得驕語遠蹈也宵旰而諮諏者何人不得褒如充耳也朝詣闕夕陳奏焉楊司馬不可席中樞熊總理不可辦閫外賊撫必叛賊叛必熾賊熾必多不忍言而後竟何如痛哭狂呼罔裨事數以視徵君翔睨天外固彥祖之邁節炳魏桓之先幾其將重有感也夫其將重有媿也夫徵君生萬曆壬申終今癸巳年八十有二子孫林立曰開遠曰元吉者尤有聲沈壽民曰往予登北山之山沂索盤溪之溪謁宋何文定公故里焉而悵然不接其人及歸徙僊源交周

徵君曷庶幾猶遇也文定之有類於徵君者六矣善承先澤一多病而卷不手去二少也羸老而逾耄三身將隱國政美闕民生休戚必以問布衣膺薦五薦不赴六他比行釣德不殫記也其諸揆先後而一者矣且夫周沈之好以世哉有赫祖武彼繩我替辟於朝也同之吾何修乎吾何修乎

梅復予先生傳

辛亥十二月

嗚呼復予先生以丁酉五月卽世也予旣造其喪哭之又辭焉哀之已又欲拮據其行事次之述之而至今未有以副也厥孤鳳銜涕徵諾焉曰鳳不天天奪吾先人以逝者奄十有五年於此也吾仲若季早夭伯也失怙亦卒予茲僂然立耳然伏枕浸沉綿使一日痼弗除而訖不獲吾師一言之辱如先人何如鳳下見先人何沈子曰予後矣予後矣作復予先生傳先生姓梅氏諱有振字思正別號復予宣城人宋聖

俞都官後也都官十六傳爲養吾公可行生四子次
卽先生先生生又四子其三枝鳳而鳳兄若弟率後
先賞志謝世去以故叙說遺事獨鳳鑿鑿爲詳鳳之
言曰吾先人少岐穎落筆溢溢氣貌動止異常兒吾
從祖望雲公早器重之公故張皇正學見推羅旴江
守郡時者也先生一再紬有司輟弗應布衣井畝無
功庸顯被可稱道迺諸內行肫如外施圍如諸慕義
樂善洞洞如屬屬如潛德哉抑指屈不勝數也吾大
父大母善病先人仿徨求己病寢食醫劑遂通方書

大父積苦痰痰拂喉膈間力吐弗出先人舌探出之
大母晚困痿痺窘卧起先人負而起卧者十餘年吾
伯父承吾公側儻恥問家人產產旁落屢佐以資一
日大涌泉流泣涕露禱請代吾叔父思幹公善病
尤最大母愛憐怔怔怛怛莫遣朝夕先人先意營治
糜金錢焉罔母知也罔叔聞也旣兩公相繼死哭之
慟執季父熙虞公手曰天平降割我家至此哉兄遺
孤二弟遺女一所不俾成有立也者吾兩人不得爲
大人子矣撫訓籌畫迄沒齒如初嗚呼人亦有言莫

懿唯親莫感唯誠言至要也夫庭序之內俯仰尺咫
之前吾瞻而依者吾一體異息者也吾雁行齒者吾
連氣而分形者也此而拂焉捐焉殘莫容焉等梟獍
矣此而矯僞盜名譽焉鑿鬼神矣本之心率之性吾
先人誠難哉且夫蕭母患風叡明水泪庾兄劇疫叔
袞獨留或一時或一遇耳日相酬乎疾痛呻吟之毒
而了無人倫燕喜之驩其甚者酸辛不忍言焉安之
若固然久之而彌篤愷靡倦此豈聲音笑貌爲者耶
竊謬以爲先人誠難誠難先人寬質厚衷周於恩義

卹里人宗人之貧不克葬餓不充腹者有舟人負金
不能庚鬻兒以庚先人愕而麾之令還兒更助之舟
鄰有號泣鬻其妻者如值完其妻諸樹德皆此類而
大者敦禮師傅勅我兄弟早從游乎姑山華陽之間
蓋備知處已爲學大方及文章法度不苟隨一世云
先人享年八十四子長枝南次枝喬次不肖枝鳳也
又次枝遇並守一衿無所效矧鳳今惇惇於茲先美
不彰我辜芻贖痛哉其言如此鳳字子翔名行尤著
所撰石軒詩爲時傳誦己酉夏大水漂蕩人畜廬舍

無算浮棺暴骨填壑塞莽子翔哀而收之次第來取
未盡者擇地瘞之又酌酒爲文祭之詳見掩流棺紀
事仁人之澤溥矣哉是父是子信夫

沈子曰吾聞孔子論取人矣士信慤而後求知能焉
士不信慤而多知能譬之其豺狼也不可以身邇也
噫至言哉吾執此律人久矣夫健焉誥焉口哼焉者
鮮不變易須斯者也諸梅材甚高顧躬躬壹謹繩尺
無華言無飾行復子先生導之素矣華陽者予友周
鹿溪儀部也儀部忠而殞於國賊先時負笈易名而
諱其師者多矣諸梅訟益堅營護其孤益篤曰某等
無忘先人之命噫難矣哉誠難矣哉